

佛说温室洗浴众僧经 1 卷

No. 701

佛说温室洗浴众僧经

后汉安息三藏安世高译

阿难曰：「吾从佛闻如是：

「一时佛在摩竭国因沙崛山中，王舍城内。有大长者奈女之子，名曰耆域，为大医王，疗治众病——少小好学，才艺过通；智达五经、天文地理——其所治者，莫不除愈；死者更生，丧车得还。其德甚多，不可具陈；八国宗仰，见者欢喜。

「于是耆域夜欵生念：『明至佛所，当问我疑。』晨旦，勅家大小眷属，严至佛所。到精舍门，见佛炳然，光照天地。众坐四辈，数千万人，佛为说法，一心静听。耆域、眷属下车直进，为佛作礼，各坐一面。

「佛慰劳曰：『善来，医王！欲有所问，莫得疑难！』

「耆域长跪白佛言：『虽得生世，为人疎野，随俗众流，未曾为福。今欲请佛及诸众僧、菩萨大士，入温室澡浴。愿令众生长夜清静，秽垢消除，不遭众患。唯佛圣旨，不忽所愿！』

「佛告医王：『善哉，妙意！治众人病，皆蒙除愈，远近庆赖，莫不欢喜。今复请佛及诸众僧，入温室洗浴，愿及十方众药疗病，洗浴除垢，其福无量。一心谛听，吾当为汝先说澡浴众僧反报之福！』

「佛告耆域：『澡浴之法，当用七物，除去七病，得七福报。何谓七物？一者、然火；二者、净水；三者、澡豆；四者、苏膏；五者、淳灰；六者、杨枝；七者、内衣。此是澡浴之法。何谓除去七病？一者、四大安隐；二者、除风病；三者、除湿痹；四者、除寒冰；五者、除热气；六者、除垢秽；七

者、身体轻便，眼目精明。是为除去众僧七病。如是供养，便得七福。何谓七福？一者、四大无病，所生常安，勇武丁健，众所敬仰；二者、所生清净，面目端正，尘水不着，为人所敬；三者、身体常香，衣服洁净，见者欢喜，莫不恭敬；四者、肌体濡泽，威光德大，莫不敬叹，独步无双；五者、多饶人从，拂拭尘垢，自然受福，常识宿命；六者、口齿香好，方白齐平，所说教令，莫不肃用；七者、所生之处，自然衣裳，光饰珍宝，见者悚息。』

「佛告耆域：『作此洗浴众僧、开士，七福如是。从此因缘，或为人臣、或为帝王，或为日、月四天神王，或为帝释、转轮圣王，或生梵天，受福难量；或为菩萨，发意持地，功成志就，遂致作佛。斯之因缘，供养众僧，无量福田，旱涝不伤。』

「于是世尊重为耆域而作颂曰：

「『观诸三界中，	天人受景福，
道德无限量，	谛听次说之。
夫人生处世，	端正人所敬，
体性常清净，	斯由洗众僧。
若为大臣子，	财富常吉安，
勇健中贤良，	出入无罣碍，
所说人奉用，	身体常香洁，
端正色从容，	斯由洗众僧。
若生天王家，	生即常洁净，
洗浴以香汤，	苾芬以熏身，
形体与众异，	见者莫不欣，
斯造温室浴，	洗僧之福报。
第一四天王，	典领四方域，
光明身端正，	威德护四镇，
日月及星宿，	光照除阴冥，
斯由洗众僧，	福报如影响。
第二忉利天，	帝释名曰因，
六重之宝城，	七宝为宫殿，
勇猛天中尊，	端正寿延长，
斯由洗众僧，	其报无等伦。

世间转轮王，七宝导在前，
周行四海外，兵马八万四，
明宝照昼夜，玉女随时供，
端正身香洁，斯由洗众僧。
第六化应天，欲界中独尊，
天相光影足，威灵震六天，
自然食甘露，妓女常在边，
众德难称誉，斯由洗众僧。
梵魔三钵天，净居修自然，
行净无垢秽，又无女人形，
梵行修洁己，志淳在泥洹，
得生彼天中，斯由洗众僧。
佛为三界尊，修道甚苦勤，
积行无数劫，今乃得道真，
金体玉为璎，尘垢不着身，
圆光相具足，斯由洗众僧。
诸佛从行得，种种不劳勤，
所施三界人，无所不周遍，
众僧之圣尊，四道良福田，
道德从中出，是行最妙真。』

「佛说偈已，重告耆域：『观彼三界，人天品类，高下长短，福德多少，皆由先世用心不等，是以所受各异，不同如此；受诸福报，皆由洗浴圣众得之耳！』」

佛说经已，阿难白佛言：「当何名此经？以何劝诲之？」

佛告阿难：「此经名曰“温室洗浴众僧经”。诸佛所说，非我独造；行者得度，非神授与。求清净福，自当奉行。」

佛说是经竟，耆域、眷属闻经欢喜，皆得须陀洹道，礼佛求退，严办洗具。众坐大小，各得道迹，皆共稽首，礼佛而去。

佛说温室洗浴众僧经

【经文信息】大正藏第 16 册 No. 0701 佛说温室洗浴众僧经

【版本记录】CBETA 电子佛典 Rev. 1.12 (Big5), 完成日期: 2009/05/24

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 维习安大德提供之高丽藏 CD 经文, 维习安大德提供, 北美某大德提供, 三宝弟子提供新式标点

【其他事项】本数据库可自由免费流通, 详细内容请参阅【[中华电子佛典协会数据库版权宣告](#)】
